

13. maji

UPA2016/47

Pisortat ataatsimoortumik allaffissornerisa aaqqissugaanerannut atatillugu naliliinissamut ataatsimiititaliarsuarmik pilersitsisoqarnissaanut Naalakkersuisut peqquneqarnissaanut Inatsisartut aalajangiiffigisassaattut siunnersuut. Maanna suliassaasut aallaavigalugit allaffissornerup annertussusaa ataatsimiititaliarsuup nalilersussavaa, suleriaatsit sunniuteqarluarnerusut pilersinnissaannut immikkoortorta qarfiillu suliassa qarfiillu (sektorit) akimorlugit suleqatigiinnerup pitsanngorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkartinneqannginnissaat aallaaviussaaq. Ataatsimiititaliarsuaq inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Ataatsimiititaliarsuaq assigiinngissitaartuneersunit ilaliussanik sulisitaqassaaq, sulininilu ukiut marluk iluanni naammassissallugu. Tamatuma kingorna ataatsimiititaliarsuup innersuussutai Inatsisartuni politikkikkut suliarineqassapput.

(Inatsisartunut ilaasortat Múte B. Egede, Inuit Ataqatigiit aamma Naaja H. Nathanielsen, Attaviitsoq)

Siullermik Siumumiit una qulequtaq qaqqinneqartoq nuannaarutigaarput.

Nunatsinni innuttaasut kiffartuunneqarnerat, sullinneqarnerat allatullu pisortat susassa qarfiit pillugit allaffissorneq ukiuni kingullerni annertuumik oqallisaasarpoq.

Aammalu qanoq iliuuseqarfigineqartarluni, taamaammat Inatsisartuni politikkikkut oqallisigineqarqinnera pissusissamisoortutut isigaarput.

Apeqqutimmi amerlasinnaapput, uumap qulequttap qaqqilertersinnaasai. Assersuutigalugu innuttaasunik kiffartuussineq qaffasissusissaa sumiissua? Kommuunit suut suliassaraat, Namminersorlutik oqartussat suut suliassaraat? Innuttasuulluni, paasinarluinnartumik nalunarsinnaavoq susassa qarfiit kikkut akisussaaffigineeraat ilisimassallugu.

Imaluunniit apeqqutigineqarsinnaavoq innuttaasunik sullissinerit sorliit amigaataappat immaqaluunniit pisariaqartikkunnaarneqarsimappat, sorliit sipaarutaassappat, sorliit annertusassappat? Innuttaasunit pisortat kiffartuussinissai suut ullumikkut ingerlatinngisaat ujartorpaat? Imaluunniit neqeroorutit naammappaat?

Apeqqut alla tassaasinnaavoq pisortat kiffartuussinerit sorliit ingerlatissuaat, ilai namminersortunut suliakkiutaasinnaappaat? Assersuutigalugu eqqaaviit imaartarneri, taamaattoqassappat inoqarfinnit tamanut tulluuppaa? Kiffartuussinerit sorliit qanoq aningaasalersorseqassappat? Pisortat karsiiniit imaluunniit atuisut akiliisarneritiguut?

Qulequtsiisullu aamma ilaatigut apeqqusigaat tassaasoq nunatsinni ullutsinni pisortaniit innuttaasunik kiffartuussineq naammaginarpaat, sulisut amerlavallaarpaat, ikippallaarpaat imaluunniit allatut allaffissorineq aaqqissugaasariaqarpaa?

Apeqquterpassuusinnaapput, nalunangittumik ullumikkut uumap oqallisigineqarnerani tamakkersinnaangilagut, minnerunngitsumillu tamaasa akisinnaangilagut.

Aammattaarlu Naalakkersuisut akissuteqarnermini nalunaarusiarpassuit, misissuinerpassuit, ataatsimiititaliarpassuit suliai arlallit taakkartorpai, qularnanngitsumik apeqqutit arlallit taakkunani akissutissaqareerput.

Taamaamat Siumumiit una aalajangiiffigisassatut siunnersuut aappassaaneernejartinnagu Aningaasaqarnermut Ataatsimiititaliamut suliasanngorlugu innersuupparput, sukumiisumik misissugassanngorlugu, ilumut pisariaqarnerisooq ataatsimiititaliarsuarmik nutaamik pilersitsinissaq.

Qujanaq.

Jens-Erik Kirkegaard,

Siumut.